

Na osnovu člana 5. Uredbe o taksenim markama („Službene novine Kantona Sarajevo“, br.15/98, 15/00, 18/02, 23/02 i 4/03), ministar finansija Kantona Sarajevo donosi

## **PRAVILNIK O ŠTAMPANJU I PRODAJI TAKSENIH MARAKA**

### **Član 1. (Predmet regulisanja)**

Ovim Pravilnikom propisuju se uslovi i način štampanja i stavljanja u promet administrativnih i sudskih taksenih maraka (u daljem tekstu: taksene marke).

### **Član 2. (Ugovor o prodaji)**

(1) Ministarstvo finansija Kantona Sarajevo (u daljem tekstu: Ministarstvo finansija) može povjeriti štampanje taksenih maraka pravnom licu (u daljem tekstu: dobavljač) koje osigurava zaštitu i sigurnost štampanja i koje je u skladu sa Zakonom o javnim nabavkama („Službeni glasnik BiH“, broj 39/14) izabran kao najpovoljniji ponuđač.

(2) Ugovorom između Ministarstva finansija i dobavljača kome se povjerava štampanje taksenih maraka, regulisat će se odnosi u vezi planiranih potreba i naručenih količina taksenih maraka, mjesto i način predaje odštampanih taksenih maraka, način zaštite taksenih maraka, te vođenje evidencije o odštampanim i isporučenim taksenim markama.

(3) Na osnovu ugovora iz stava (2) ovog člana Ministarstvo finansija daje dobavljaču narudžbu za izradu taksenih maraka.

### **Član 3. (Preuzimanje i pohranjivanje taksenih maraka)**

Komisija za poslove oko izrade i distribucije administrativnih i sudskih taksenih maraka osnovana u Ministarstvu finansija (u daljem tekstu: Komisija), preuzima taksene marke od dobavljača i iste pohranjuje u kasu pri Ministarstvu finansija.

### **Član 4. (Prodaja administrativnih taksenih maraka)**

(1) Ministarstvo finansija, na osnovu ugovora, prodaju administrativnih taksenih maraka povjerava općinama Kantona Sarajevo i pravnom licu ovlaštenom za prodaju administrativnih taksenih maraka izabranom kroz postupak javnih nabavki (u daljnjem tekstu: ovlašteni prodavač).

(2) Ugovorom iz stava (1) ovog člana regulišu se obaveze obezbjeđenja dovoljne količine taksenih maraka na prodajnom mjestu, način trebovanja i prodavanja istih, kao i visina naknade za usluge prodaje i dr.

(3) Izdavanje taksenih maraka iz kase vrši Komisija na osnovu usmenog ili pisanog zahtjeva općine i ovlaštenog prodavača.

#### Član 5.

##### (Prodaja sudskih taksenih maraka)

(1) Ministarstvo finansija prodaju sudskih taksenih maraka povjerava zaposleniku Ministarstva finansija-Viši referent za prodaju sudske takse (u daljem tekstu: ovlašteni prodavač sudskih taksenih maraka).

(2) Pravna lica koja imaju potrebu za nabavkom sudskih taksenih maraka u iznosu većem od 1.000,00 KM iste mogu nabaviti u Ministarstvu finansija uplatom sredstava na depozitni račun za prikupljanje javnih prihoda Kantona Sarajevo, broj 3380002210019263, na vrstu prihoda 722221, općina 077, svrha uplate: „uplata za sudske taksene markice“.

(3) Pravno lice može više puta podnijeti zahtjev za nabavku sudskih taksenih maraka u toku godine, s time da niti jedan zahtjev ne prelazi iznos od 20.000,00 KM.

(4) Komisija će na osnovu pisanog zahtjeva pravnog lica i dokaza o izvršenoj uplati (uplatnica), nakon pribavljanja potvrde o izvršenoj uplati iz Registra uplaćenih prihoda (RAS-a), uplatiocu izdati taksene marke u protuvrijednosti uplaćenog iznosa i Nalog blagajne o izdatim taksenim markama.

#### Član 6.

##### (Zaduženje taksenim markama)

(1) Ukupno akontativno zaduženje općine administrativnim taksenim markama ne može biti veće od 20.000,00 KM.

(2) Ovlašteni prodavač može se zadužiti administrativnim taksenim markama do visine akontativno uplaćenih sredstava na depozitni račun Kantona Sarajevo (u daljem tekstu: depozitni račun).

(3) Ukupno akontativno zaduženje ovlaštenog prodavača sudskim taksenim markama ne može biti veće od 30.000,00 KM.

#### Član 7.

##### (Dokaz o uplati)

(1) Općine i ovlašteni prodavači koji akontativno zadužuju taksene marke dužni su kod svakog novog trebovanja taksenih maraka dostaviti Komisiji dokaz o prethodno izvršenoj uplati sredstava na depozitni račun.

(2) Komisija će na osnovu dokaza o izvršenoj uplati izvršiti umanjenje zaduženja licu koje se akontativno zadužilo za visinu izvršene uplate.

Član 8.  
(Vođenje evidencije)

Općine i ovlašteni prodavači dužni su voditi evidenciju o zaduženju i prodaji zaduženih taksenih maraka, te istu jedanput godišnje uskladiti sa evidencijom u Ministarstvu finansija.

Član 9.  
(Dostavljanje izvještaja)

Komisija je dužna Ministru finansija Kantona Sarajevo dostavljati izvještaj o stanju izdatih i naplaćenih taksenih maraka dva puta godišnje, a na njegov zahtjev i više puta godišnje.

Član 10.  
(Mjesto prodaje taksenih maraka)

(1) Prodaja administrativnih taksenih maraka od strane općine i ovlaštenih prodavača vršiče se u prostorima općine, MUP-a Kantona Sarajevo ili u poslovnom prostoru ovlaštenog prodavača u blizini navedenih institucija.

(2) Prodaja sudskih taksenih maraka vršiče se u poslovnom prostoru izvan prostora Ministarstva finansija, u blizini zgrade Suda.

Član 11.  
(Prestanak važenja)

Stupanjem na snagu ovog Pravilnika prestaje da važi Pravilnik o štampanju, distribuciji i prodaji taksenih maraka („Službene novine Kantona Sarajevo“, broj 13/04).

Član 12.  
(Stupanje na snagu)

Ovaj Pravilnik stupa na snagu danom donošenja i objavit će se u „Službenim novinama Kantona Sarajevo“.



Broj: 08-01-02-4710/16  
Sarajevo, 18.02.2016.godine